

HOSHIMJONGA XAT YOZDIK

Qaysi Hoshimjonga, deysizmi? Barchamiz sevib o'qiydigan «Sariq devni minib» asarining bosh qahramoniga-da:

«Salom, Hoshimjon Ro'ziyev! Biz yaqinda butun sinfimiz bilan sarguzashtlaringiz haqidagi kitobni o'qib chiqdik. Avvaliga sizga juda o'xshagimiz keldi. Lekin asardan to'g'ri xulosa chiqargach, angladikki, bilimli bo'lmay turib, hech bir kasbning boshini tutib bo'lmas ekan.

Sizning sehirli qalpoqchangiz aslida bor. Faqat u ilmi va mehnatkash insonlargagina nasib etadi».

Lazizbek BAFOYEV,
Shahribonu OCHILOVA,
Buxoro viloyati, G'ijduvon tumanidagi
8-maktab o'quvchilari

BIZ HAM SEVIB O'QIYMIZ

Bolalikdan hamroh bo'lgan «Tong yulduzi» gazetasini hamon qo'lmdan qo'ymay, o'quvchilarim bilan birgalikda o'qib kelaman. Shogirdlarim respublikadagi tengdoshlari hayotiga oid maqolalarni o'qib, ular erishayotgan yutuqlarga havas qilishadi. Ayniqsa, «Katta tanaffus», «Qizlar akademiyasi» sahifalarini maroq bilan o'qishadi.

Respublikamiz yoshlarini tarbiyalashda o'rni beqiyos bo'lgan bu nashrga ikkinchi yarim yillik uchun ham albatta obuna bo'lamiz.

Rohatoy HAKIMOVA,
Samarqand viloyati, Pastdarg'om tumanidagi
27-maktab o'qituvchisi

Vatan yagonadir, Vatan bittadir!



O'zbekiston Respublikasi bolalar va o'smirlar gazetasi

2009-yil
18-may
N:20
(66717)

Gazeta 1929-yil 1-avgustdan chiqib boshlagan

ISSN – 2010-6092

Xonobodda shunday maktab bor...



Maktab hayotiga oid maqolalarni
2-betda o'qiydilar.

«URUSH BO'LMASIN JAHONDA!»

Yaqinda Oliy va o'rta maxsus kasb-hunar ta'lim markazi, O'zbekiston Respublikasi «Mehr va muruvvat» fondi va Xalqaro Qizil Xoch qo'mitasi tomonidan o'tkazilgan insholar tanlovi ana shunday nomlandi.

Unda respublikamizning 12 viloyati, Qoraqalpog'iston Respublikasi hamda Toshkent shahridan jami 14 o'quvchi qatnashdi. Tanlovda men ham ishtirok etdim. Biz otabobolarimiz xotiralari asosida urushning ayanchli oqibatlarini, yurtimiz tinchligi yo'lida hatto jonini ham fido qilgan jangchilarimiz jasorati, suronli, og'ir damlarda ham insoniylik fazilatini yo'qotmagan xalqimiz matonati, shuningdek, bugungi farahbaxsh kunlarimizning qadriga yetishimiz lozimligi haqida to'lqinlanib yozdik.

Men tanlovning ro'yi zamin sayqali Samarqandda o'tkazilgan respublika bosqichida Toshkent shahri sharafini himoya qilib, 2-o'rinni qo'lga kiritdim. Sertifikat hamda esdalik sovg'alari bilan taqdirlandim. Ko'hna Samarqandning barcha me'moriy obidalarini ziyorat qilib, ko'plab yangi do'stlar ortirib, bir olam taassurotlar bilan qaytdik.

Tinchlik deb atalmish ulug' ne'matning qadriga yetishimiz, ajdodlarimiz xotirasiga hamisha hurmat va ehtirom ko'rsatishimiz lozimligini yana bir bor yodga soluvchi mana shunday tadbirlar tez-tez o'tkazib turilsa, ayni muddao bo'lardi.

Madina MIRZAQOBILOVA,
O'ZDJTU qoshidagi Uchtepa akademik litseyi 2-bosqich
talabasi


ULKAN GLOBUS

O'quvchilarim bilan sayohat qilishni xush ko'rganimiz uchun, yaqinda O'zMUning «Geologiya muzeyi»ga bordik. Geografiya fakultetida bo'lib, sayyoh Hamidulla Hasanov nomidagi «Globus» o'quv-metodika xonasi bilan tanishdik. Hamrohimiz «Tabiiy geografiya va geografiya ta'limi metodikasi» kafedrasini mudiri, dotsent Mirali Mirzakarimov bizga ulkan globus haqida ma'lumot berib o'tdilar.

Birinchi globusni XI asr boshida vatandoshimiz Abu Rayhon Beruniy yasagan. Oradan IX asr vaqt o'tib, H.Hasanov buyurtmasi va maslahati bilan dunyoda yagona relyeffli globus yaratildi. Ushbu globusning og'irligi 500 kilogrammga yaqin, balandligi 2,5 metr, diametri 2 metrdir. Biz ham yurtimiz Hamidulla Hasanov bilan faxrlandik. «Yaxshidan bog' qoladi», degan naql bejizga aytilmaganligiga yana bir bor amin bo'ldik.

Gulchehra MIRBOBOYEVA,
Toshkent shahar, Shayxontohur
tumanidagi 132-maktabning ona tili va adabiyot fani o'qituvchisi

Xalqim mehrin dilimga joylab, O'z mehrimni berarmikanman?!




Xonobod qishlog'i Toshkent viloyati, Zangiota tumanining go'zal maskanlaridan biri hisoblanadi. Bir tomoni poytaxt tumanlari, ikkinchi tomoni Chirchiq daryosi bilan chegaradosh bo'lgan bu go'zal go'shadan xalqimiz ardog'ida bo'lgan ko'plab insonlar yetishib chiqqanlar. Ularning kamolga yetishlarida qishloqdagi 25-umumta'lim maktabining ham xizmati beqiyos. Yaqinda gazetamiz muxbirlari

mazkur maktabda bo'lib, u yerdagi tengdoshlaringiz hayoti, ular amalga oshirayotgan ko'plab ibratli ishlar bilan tanishib qaytdilar.

Maktab rahbari Avaz aka Muhitdinovning aytishlaricha, o'quvchilar fan Olimpiadalari, ko'plab nufuzli sport musobaqalarida hamisha sovrindorlar qatoridan o'rin egallashgan.

2009-yil – «Qishloq taraqqiyoti va farovonligi yili» deb e'lon qilinishi tengdoshlaringiz hayotida tub burilish yasabdi. Bu yil birinchi sinfga qabul qilingan har bir o'quvchi bittadan mevali yoki manzarali daraxt ekishibdi. Eng qizig'i, ularning barchasi birdek yashnab turishi kishining ko'nglini quvontiradi.

Bundan tashqari, kaftdek bo'lsa ham har bir sinfning o'z yer maydoni bor. Bolalar darsdan bo'sh paytlarida o'z maydonchalarida nihollarga qaraydilar, rang-barang gullarni parvarish qiladilar. Kimning bog'i ko'rkamroq, degan tuyg'u hamisha ularni g'ayratga chorlaydi.



MEN USTOZ BO'LAMAN

Surayyo SHARIPOVA, 11-«A» sinf o'quvchisi:

– Bugun katta hayot bo'sag'asida turibmiz. Ko'plab tengdoshlarimni «Kim bo'lsam ekan?» degan savol qiynayotgan bo'lishi tabiiy. Men bu muammoni allaqachon hal qilganman. Ona tili va adabiyot o'qituvchimiz Shoira opa Abdullayeva birinchi bor darsga kirgan kunlari ularga havas qilgan edim. Ustozimiz yozuvchi va shoirlar hayoti, ularning asarlari haqida shunday qiziqarli ma'lumotlar berar edilarki, hammamiz mahliyo bo'lib qolardik. Go'yoki o'sha ijodkorlar xuddi yonimizda turgandek bo'lardi. Bugun mening yagona orzum – Shoira opa kabi mehribon ustoz bo'lish. Bolalarni ular kabi ijodning sehirli olamiga olib kirish.

XONOBODDA

SHUNDAY MAKTAB BOR...

BOLALIK

Quyosh chiqdi deguncha,
Ko'chaga yuguramiz.
Do'stlar bilan yig'ilib,
O'ynashga ulguramiz.

Boramiz dala-boqqa,
Kiramiz gul-chorboqqa.
Mevalar pishib yotar,
Bizni o'ziga tortar.

Orzularga chanqoqimiz,
Biz shundayin quvnoqimiz.

Gulnoza SAIDMUHAMMEDOVA,
8-«D» sinf o'quvchisi



«Derazamning tagida bir tup
O'rik oppoq bo'lib gulladi».
Yozib ketdi Hamid Olimjon,
Buni o'qib, qalbim yashnadi.

U naqadar suygan bahorni,
Tabiatni ko'p bor kuyлади.
O'qib uning otashin she'rin
Qalbimda bir ilinj uyg'ondi:

Shoir bo'lib so'zlarni durdek,
Bir tizimga terarmikanman?!
Xalqim mehrin dilimga joylab,
O'z mehrimni berarmikanman?!



Zebo QAHHOROVA

QALBIM
YASHNADI

ORZUM USHALDI

Muattar ESHHOJIYEVA: – Maktabda o'qib yurgan kezlirim, ustozlarimga havasim baland edi. Bora-bora o'qituvchi bo'lish istagi hayotim mazmuniga aylandi. Bugunga kelib, bir paytlar o'zim orzu qilgan insonlar bilan bir safda o'quvchilarga bilim berayotganimdan xursandman. Endigi maqsadim, ustozlarim kabi o'quvchilarim mehrini qozonish, ularning eng yaqin do'stiga aylanish.

VATAN KUYCHISINI XOTIRLAB

Xalq maorifi a'lochisi Zuhra opa Mahmudova o'quvchilarning sevimli ustozlaridan biri. Tashrifimiz kuni opa rahbarligida 3-«A» sinf o'quvchilari O'zbekiston xalq shoiri Muhammad Yusuf taval-ludining 55 yilligiga atab xotira kechasi uyushtirishgan ekan. Ustozlar va ot-onalar ishtirok etgan tadbirda bolajonlar shoiring Vatan, ta'lim-tarbiya, mehr va sadoqat haqidagi she'rlaridan namunalar o'qib, barchaning olqishiga sazovor bo'ldilar.



OZODA MAKTABNING DONO OPASI

Dono opa Azizova uzoq yillardan buyon mazkur maktabda farrosh bo'lib ish-laydilar. Uch nafar farzandlari shu mak-tabda bilim olishgan. Erta tongda kelib, sinf xonalarini chin-nidek qilib qo'ya-dilar, derazalarni ochib, havoni almashtiradilar. Ular hamisha bolajonlar ta'lim-tarbiya oladigan joylar orasta bo'lishini istaydilar.



Tengdoshlaringiz
Doston Mahmudov
va Nargiza O'rozo-
valarning niyatlari
me'mor va dizayner
bo'lish. Ular bu
yo'lda hozirdanoq
izlanishmoqda.
O'rtoqlaringiz

YAKKAKURASH ISHQIBOZLARI

Maktabda sportning kikkboksing va taekvando turiga qiziquvchi bolalar ko'plab topiladi. Ular tuman, viloyat va respublika musobaqalarida hamisha sovrindorlar safida. Vaqti kelib, bu bolalar jahon chempionatlari g'oliblariga aylanishlariga umid qilamiz.

Sahifani Yusuf FAYZULLO,
Umiddjon HAYITOV tayyorlashdi



yaratgan sharqona
uslubdagi binolar
ko'pchilikni hayratga
soladi. Biz ham
ularning kelajakda o'z
ishining ustasi bo'lib
yetishishlariga
tilakdoshmiz.

MEHRDAN QURILGAN KO'PRIK

Bir kuni dars boshlanganda, direktor sinfga yangi bolani boshlab keldi. Dars o'tayotgan o'qituvchi direktor ketgach, bolaga qarab:

– Nimaga serryib qolding? O'tirmaysanmi, shalpanquloq? – dedi.

Sinfda qattiq kulgu ko'tarildi. Bo'ychan, rostdan ham quloqlari shalpangroq yangi bola qizarib ketdi. Qayerga o'tirishni bilmay kalovlandi. O'qituvchi bu vaziyatdan yayrab:

– Oh-ho, nima balo, otangning paltosini kiyib olganmisan, muncha uzun bo'lmasa? – deb ikkinchi marta bolani mulzam qildi. Yangi bola battar lovulladi:

– Xo'sh, familiyang nima? Qayerdan kelib qolding? – deb so'radi o'qituvchi.

– Ota-onang nima ish qiladi?


Yangi bola qishloqdan kelishganini, otasi shu tumanga rahbar etib tayinlanganini aytdi.

Birdan o'qituvchining aftangori o'zgardi:

– E, Elzodjon, nimaga buni darrov aytmadingiz? Sizni qarang-u, Begzod Islomovich salomatmilar?

Barcha o'quvchilar, hattoki yangi bola ham o'qituvchiga hayrat bilan qarab qoldi.

Keling, endi voqeani



teskarisiga o'giramiz.

Dars boshlanganda, direktor sinfga yangi bolani boshlab keldi. Dars o'tayotgan o'qituvchi:

– Mana, bolalar, sizlarning safigizga yangi do'st qo'shildi. Qani, qaysi partada bo'sh joy bor? Sherzodning partasida bo'sh joy bor ekan. O'sha yerga o'taqoling. Hozir men mavzuni tugataman va siz bilan yaxshilab tanishamiz, – deb darsni davom ettirdi. Mavzu tugagach, o'qituvchi o'z joyiga o'tirdi va: – Qani, yangi bola, ismi-sharifingiz kim? O'zingizni bolalarga tanishtiring-chi, – deb yangi o'quvchiga yuzlandi.

Yangi bola bu munosabatdan ruhlendi.

– Ismim Elzod, familiyam Islomov. Avval Badaxshondagi 6-maktabda o'qiganman. Dadam tuman markaziga ishga keldilar, – deb dadil javob berdi.

– Bolalar, odamning begonasi bo'lmaydi. Ko'rinib turibdiki, Elzod a'lochi bolaga o'xshaydi. Uni qo'llab-quvvatlanglar, begonalatib qo'ymanglar. Yaxshi do'st bo'linglar, – dedi o'qituvchi yangi bolaga o'tiring ishorasini qilgach.

O'qituvchining o'quvchiga bo'lgan munosabatini bir ko'prikk qiyoslasak, u qadrga qadr, ehtiromga ehtirom javobi asosida qurildi. Yangi bola ham o'qituvchining bu munosabatini bir umr to'lqinlanib xotirlaydi.

Gulmiraxon ISLOMBEKOVA,
O'zbekiston Davlat jahon tillari universiteti 4-bosqich talabasi

QISHLOQ HAQIDA O'YLAR



Ona qishlog'im! Sen naqadar go'zal va betakror maskansan. Men har lahza Vatanim deya faxrlanganimda, sening bepoyon dalalaringni, subhidamdan navo bazmini boshlagan bulbullaringni, anhorlaringda sharqirab oqayotgan zilol suvlaringni, saxovatli, bag'ri keng, sodda odamlaringni yodga olaman. Men sening mazali noningni yeb, shifobaxsh suvingdan ichib ulg'aygan farzandingman. Men uchun ona yurt sendan, sening dalalaringdagi egatdan boshlanadi. Oh, ona qishlog'im!..

Taqdir meni sendan yiroqlarga tashlamasin, men qanchalik rohat-farog'atda yashamayin, doimo senga intilaman.

Ko'nglimdagi sog'inch tuyg'ulari esa sen tomon meni undayveradi. Shuning uchun bo'lsa kerak, har on erishgan yutuqlarimni sen-la o'rtoqlashish, sen-la dardlashish uchun bag'ringga talpinaman...



Nozima BERDIALIYEVA,
Namangan viloyatidagi

7-igtidorli bolalar maktab-internatining 9-sinf o'quvchisi

2009-YIL - QISHLOQ TARAQQIYOTI VA FAROVONLIGI YILI



«Qishlog'im – qalb ardog'im» tanloviga

OLLOH NAZARI TUSHGAN YURT

Vatan... Naqadar ulug' so'z-a?! Shu birgina so'z zamirida olam-olam ma'no mujassam. Vatan, avvalo ostonamizdan, oilamizdan va albatta ona qishlog'imizdan boshlanadi. Oilani, ostonani, qishloqni sevmoq Vatanni sevmoqdir. Men tug'ilib o'sgan, kindik qonim to'kilgan va voyaga yetayotgan muqaddas go'sham Og'asaroy qishlog'idir.

Ikkita baland tepalikning qoq o'rtasida joylashgan qishlog'imdan insonni o'ziga mahliyo qilib, butun vujudini chulg'ab oladigan, tashna qalblarga darmon bo'ladigan G'ovasoy oqib o'tadi. Qishlog'imda yana «Tog' shalolasi» nomli bolalar dam olish oromgohi joylashgan bo'lib, yoz kelishi bilan shodon qiyiriqlarga to'lib ketadi.

Ayniqsa, siz baland tepalik ustidan uning xushmanzara joylarini, go'zal ko'rinishini tomosha qilib ko'ring, o'z shahringiz yoki qishlog'ingizga qaytib ketolarmikansiz? Qishlog'im o'zining chiroyi bilan hali she'r yozishga qalam tutmagan insonni ham shoir

qilib qo'yadi.

Men o'z she'rlarimni mana shu muqaddas qishlog'imning manzarasidan – erta bahorda boychechak, lola, binafsha bilan qoplangan tepaligidan, sho'x va o'ynoqi soyning jildirashidan, oy shu'lasining tunda soy betiga tushib qolishidan, ma'yus xayolga cho'mgan majnuntoldan, qishlog'imning baxtiyor o'g'il-qizlaridan, mevali va manzarali daraxtlaridan, mehnatkash odamlaridan, oltinrang bug'doyzorlari, paxtazorlaridan, maktab, shifoxona, bolalar bog'chasidan, xullas, barcha manzaradan hayratlanib, zavqlanib, faxrlanib yozaman. Oллоh nazari tushgan shu qishloq farzandi ekanligimdan behad baxtiyorman.

Maxsuma TURG'UNBOYEVA,
Chust tumanidagi 28-maktabning 7-«A» sinf o'quvchisi

BEG'UBORLIK

(Hikoya)

Mehriniso dadasining ishdan qaytishini sabrsizlik bilan kutadi. Oqshom horg'in qaytadigan Karim akaning esa qo'lida doimo qiziga atalgan nimadir bo'ladi:

o'yinchoq, qand-qurs, muzqaymoq...

Bugun kech tushishi qiyin bo'ldi. Kun bo'yi tinimsiz yomg'ir yog'di. Mehrinisoning ikki ko'zi eshikdan uzilmadi. Qo'lida oddiy oq qog'ozga chizilgan rasm – dadasi bilan o'zi. O'zi chizgan!

Rasmni u hafসাala bilan qayta-qayta chizdi, bo'yadi. Qishloqqa borganida, o'zi ko'rgan manzarani – baland tog', yamyashil adirlar, qirlarga tutashib ketgan so'qmoqni tasvirlagan bo'ldi. So'qmoq ham oddiy emas, atrofida qip-qizil qizg'aldoqlar ochilib yotibdi. Orasida mittigina qo'zigullar ham ko'zga tashlanadi. Karim aka qizining qo'lidan tutganicha tepalikka o'rlab boryapti. Ota-bolaning qarshisidan esa Mehrinisoning momosi pishirgan shirmoy nonday bo'lib kattakon quyosh chiqib kelayotir...

Bir kuni dadasi ishdan erta qaytdi. Qo'lida bejirimgina quticha.

– Qani, top-chi, qizim, buning ichida nima bor?

Mehriniso sovg'ani oldi. Zarvaraqqa o'ralgan quticha uzunchoq, ammo yengil edi. Pecheni emas. Makkajo'xori qalamchasiga ham o'xshamaydi.

– O'zingiz ayt qoling, dada. Topolmadim.

– Darhol taslim bo'lma. O'ylab ko'r. Aqlni peshlab, ko'zni o'tkir qiladigan narsa nima? – Hm, qalam? Ha, qalam!

Qizaloq qutini avaylab ochdi. Har xil rangdagi qalamlarning chiroyli yo'nilgan uchlari ko'rinib turar edi.

Mehriniso go'yo o'yinchoqlarini unutdi. Qo'lidan qog'oz-qalam tushmaydigan bo'ldi. Albomida bo'sh varaq qolmadi: olma, archa, qorbobo, qorqiz, beshikda uxlab yotgan ukasi. Shularning ichida eng zo'ri – dadasi bilan o'zining rasmi!

Yomg'ir tindi. Eshik qo'ng'irog'i jiringladi. Qizaloq rasmni olib, yo'lakka tomon otildi. Dadam keldilar!..

Mehriniso rasmni dadasiga tutdi:

– Dada, qarang, o'zim chizdim!

Karim aka rasmga hayrat bilan tikilib qoldi.

– Uh! Zo'rsan-ku, qizim! Gulnora Rahmonovaday rassom bo'p ketmasang hali. Endi buni ko'r, qizim! – Karim aka charm portfelidan yana zarvaraqqa o'ralgan quti chiqardi.

Mehriniso avaylabgina qog'oz o'ramini ochdi. Muqovasiga sumka ko'targan jajjigina qizchening tasviri tushirilgan kitob ekan. U ham Mehrinisoga o'xshab bu yil maktabga, birinchi sinfga o'qishga borsa kerak.

Dilafro'z ISMATOVA,
Toshkent Pediatriya tibbiyot instituti qoshidagi 2-akademik litsey o'quvchisi



Har bir yurtning buguni va kelajagi mamlakat ta'lim tizimining qay darajada rivojlanganligi bilan belgilanadi. Shuning uchun ham 17-son Davlat ixtisoslashtirilgan umumta'lim maktab jamoasi Prezidentimiz va hukumatimizning ta'lim sohasidagi qarorlarini sidqidildan bajarmoqdalar.

Bu borada maktab rahbari Liliya Aliyeva shunday deydilar:

– Maktabimiz shahar markazida joylashgan bo'lib, bir necha yillardan buyon ingliz tiliga chuqurlashtirilgan dastur asosida ishlab kelmoqda. Bugungi kunda maktabda tahsil olayotgan 1720 nafar o'quvchiga zamonaviy jihozlangan fan kabinetlari, 2 ta sport zali, tantanalar zali, to'garak xonalari, oshxona, 4 ta tibbiy xona xizmat ko'rsatmoqda. Bundan tashqari, o'quvchilar va o'qituvchilar hamkorligida muzey ham tashkil etilgan. Maktabda faoliyat olib borilayotgan «Yosh qalamkashlar», badiiy gimnastika, fortepyano, tasviriy san'at hamda sport to'garaklariga o'quvchilar faol qatnashadilar.

Ingliz tili darslari «Ijodkor ustozdan – ijodkor shogirdlar» shiori ostida olib boriladi. O'quvchilarning salohiyatini hisobga olgan holda, ularda mustaqil tadqiqotchilik ko'nikmalarini shakllantirib, rivojlantirib bormoqdamiz.

Maktabda 2012-yilgacha mo'ljallangan istiqbol rejasi ishlab chiqilgan. Ushbu rejaga kichik televizion studiya ochish, jurnalistikaga qiziquvchi faol o'quvchilarni qamrab olish kiritildi. Niyatimiz, ulkan yutuqlarimizni go'zal poytaxtimiz Toshkentning 2200 yillik tantanalariga to'yona qilishdir.

DIPLOMATYAGA IMTIHONSIZ QABUL

«Sen qonunni bilasanmi?» ko'rik-tanlovining respublika bosqichi g'olibi bo'lgan «Femida» jamoasi bilan maktabdagi barcha o'quvchi va o'qituvchilar faxrlanishadi. Bunday yutuqlar yil davomida maktab jamoasini xursand qilib kelmoqda. O'quvchilar 2007-2008-o'quv yilidagi fan Olimpiadalarida tumanda 21 ta, shaharda 7 ta va respublikada 1 ta sovrinli o'rnlarga ega bo'lishdi. Informatika fanidan o'tgan Olimpiadaning respublika bosqichi g'olibasi Laziza Maqsudova imtiyozli ravishda jahon iqtisodiyoti va Diplomatika universitetiga qabul qilindi.

TANTANAGA O'YONA

Yozgi ta'lingizni Buyuk Britaniyada o'tishini xohlasangiz, ingliz tilini o'rganishingizga to'g'ri keladi. Bugun sizga chet tilini mukammal biladigan, iqtidorli tengdoshlaringiz hamda ularning ustozlari haqida ma'lumot beramiz. Bu a'lochi o'quvchilar yozgi ta'tillarini Buyuk Britaniyada o'tkazibdilar.

Poytaxtdagi 17-son Davlat ixtisoslashtirilgan umumta'lim maktab o'quvchilari xorijdagi do'stlari bilan hozirdanoq diplomatik aloqa o'rnatganlar. Maktabning ellikdan ortiq yosh diplomatlari yozgi ta'til kunlarida Buyuk Britaniyaning xalqaro maktablarida amaliyot o'tab qaytmoqdalar. Maktab o'quvchilari 1999-yildan buyon

BUYUK BRITANIYADA O'TGAN TA'TIL

ingliz tilida «School time» va «Teenager» gazetalarini tayyorlab kelishadi. Ayni kunlarda o'quvchilar ijodiy salohiyatlarini namoyon qilish va faollashtirish maqsadida, Fransiyada bo'lib o'tadigan «Lui Fransua» rasmlar tanloviga katta tayyorgarlik ko'rishmoqda.

O'quvchilarning bunday yutuqlarga erishishlarida maktabda faoliyat olib borayotgan 98 nafar yuqori malakali ijodkor o'qituvchilarning xizmatlari katta. «Yil o'qituvchisi» ko'rik-tanlovi g'oliblari Gulnora Zaynutdinova hamda Zulfiya Zokirovalarni maktabning faxri deb aytish mumkin. Yana bir yangilik: o'qituvchilar tomonidan YUNESKOning barqaror taraqqiyot ta'limi integratsiya qilinib, yangi darslik yaratildi va YUNESKO milliy komissiyasining «Suv – hayot manbai», «Bizning o'rmon – bizning hayot», «Chiqindi boshqaruvi» loyihalari dasturga kiritildi.

– «Vatan ostonadan boshlanadi», deb bejiz aytilmagan. O'quv dargohining ostonasidan maktabning shinamligi, ozodaligi sezilib turadi,

– deydi 7-«A» sinf rahbari Hamida Rasulova. – Bularning barchasi, avvalo maktab rahbari, qolaversa, o'quvchilar mehnati orqali bunyod etilgan.



AMIRBEK AMERIKAGA NEGA BORDI?

Bunday mehnatsevar, g'ayratli va ijodkor o'quvchilar men rahbarlik qilayotgan 7-«A» sinfida ham juda ko'p. O'quvchilarning bir-birlari bilan juda ahillar. Shu sababdan ko'plab yutuqlarga erishib kelmoqdalar. Poytaxtimizning 2200 yilligiga bag'ishlab, 7-sinflar orasida «Ona shahrim – Toshkentim» mavzusidagi ko'rik-tanlovda sinfimiz 1-o'rinni egalladi. Ilg'or o'quvchilarimizdan Amirbek Hakimov milliy kurash bo'yicha Amerika, Dubay, Bolgariya, Yaponiya, Koreyada bo'lgan musobaqalarda, Faxriddin Boltaxo'jayev esa taekvando bo'yicha Rossiya, Koreya, Italiya hamda O'rta Osiyoda bo'lib o'tgan sport musobaqalarida faxrli 1-2-o'rnlarni egallab, O'zbekistonimiz bayrog'ini yuqori ko'tarib kelmoqdalar. Hulkar Ergashboyeva «Yosh kitobxon» ko'rik-tanlovining tuman bosqichida 2-o'rinni egalladi. Bundan tashqari, sinfning 20ga yaqin o'quvchilari fizika, kimyo fanlariga qiziqadilar. Pastroq o'zlashtiruvchi o'quvchilarga esa doimo a'lochilar yordam beradilar. Men o'z o'quvchilarning bilan faxrlanaman.

INGLIZ TILIDA CHOP ETILDI

Bu haqda ingliz tili fani o'qituvchisi K. Qahhorova batafsil ma'lumot berib o'tdi:

Maktabimizning oliy toifali o'qituvchilaridan L.I.Mo'minova hamda A.A.Nazirboyeva tomonidan «Odobnoma» darsligi ingliz

tilida yaratildi. Hozirgi kunda 4-sinf o'quvchilari uchun odobnoma darsi ingliz tilida olib borilmoqda. O'quvchilarning ingliz tilidagi darsni yaxshi o'zlashtirishlari uchun o'qituvchilar Buyuk Britaniya, Misr, Germaniya, Xitoy, Avstraliya, Italiya kabi davlatlarda o'tkazilayotgan anjumanlarda

qatnashib, yangi ish-tajribalarini o'quv-tarbiya jarayonida tadbiiq etmoqdalar. O'quvchilarning bilimlarini yanada oshirish maqsadida Buyuk Britaniya elchixonasi bilan hamkorlikda maktab kutubxonasini ingliz tili adabiyotlari bilan boyitishni rejaga kiritganmiz.

Darhaqiqat, yurtboshimiz «Kelajak yoshlarniki» deganlarida ana shunday iqtidorli yoshlarni nazarda tutgan bo'lsalar, ajab emas. Shu ma'noda 17-maktab ustozlarining o'quvchilaridan umidlari katta. Biz esa intiluvchan ustoz va shogirdlarga bundan ham ulkan yutuqlarga erishishlarida omad tilab qolamiz.



G'OLIBLARNI QUTLAYMIZ!

Aziz o'quvchilar! Sizlarning qanchalik bilimdon ekanligingizni sinash maqsadida, gazeta sahifalarida «Bilimdonlar tanlovi» e'lon qilinganidan xabaringiz bor. Orangizda aqlli, zukko, bir-biridan bilimdon o'quvchilar ko'pligini tahririyatga yuborgan maktublaringizdan bilib oldik. Ayrim maktublarda savollarga to'g'ri, ayrimlarida esa noto'g'ri javoblar berilgan bo'lsa-da, tanlovda ishtirok etgan o'quvchilardan mamnun bo'ldik. Ushbu tanlovda yigitlar bilimdonlikda qizlar bilan baravar bellashishdi. Shu sababli, 1-2-o'rnlarga ikkitadan g'olibni munosib ko'rdik:

1-o'rin

Madina AQILOVA,
Sirdaryo viloyati, Sirdaryo tumanidagi 41-umumta'lim maktabining 7-«B» sinf o'quvchisi.



Elyor SIROJIDDINOV,
Namangan viloyati, Mingbuloq tumanidagi 2-maktab-internatining 9-«A» sinf o'quvchisi.



2-o'rin

Gavhar SHUHRATOVA, Navoiy viloyati, Nurota tumanidagi 18-umumta'lim maktabining 8-«B» sinf o'quvchisi.

Yo'lqin ESHQUVVATOV,
Qashqadaryo viloyati, Kitob tumanidagi 28-maktabning 6-«B» sinf o'quvchisi.

3-o'rin

Diyora JO'RAYEVA,
Toshkent shahar, Yunusobod tumanidagi 260-

maktabning 5-«A» sinf o'quvchisi. Tanlovda faol ishtirok etgan barcha bilag'on o'quvchilarga minnatdorchilik bildirib, g'oliblarni 1-iyun – «Xalqaro bolalarni himoya qilish kuni»da tahririyatga taklif etamiz.



Bugungi kunda sayyoramizda bir milliarddan ortiqroq inson toza ichimlik suvi iste'mol qilish imkoniyatiga ega emas

Yodingizda bo'lsa, gazeta-mizning o'tgan sonida «Qo'g'irchoq teatriga borasizmi?» nomli fotolavha e'lon qilgandik. Bu fotosuratlar Respublika qo'g'irchoq teatrida bo'lib o'tgan ajoyib bir tadbirga tasvirga tushirildi. Tadbirga shoshib kelayotgan kichkintoylardan: «Qo'g'irchoq teatriga tez-tez kelib turasizlarmi?» deb so'raganimizda, ular, ha, tez-tez kelamiz, chunki bu yerda juda ajoyib tomoshalar, tadbirlar bo'lib turadi, deya javob berishgandi.

Endi ikki og'iz tadbir haqida to'xtaladigan bo'lsak: «Sharq ayoli» Xalqaro Ayollar Jamoatchilik fondi O'zbekiston Respublikasi Fuqarolik Jamiyati Instituti hamda «Sen yolg'iz emassan» Respublika Jamoatchilik Bolalar fondi hamkorligida «Aureliya-Dara do'stlarni taklif qiladi» nomli xayriya marafon konserti uyushtirdi. Teatr zalini to'ldirib o'tirgan jajji tomoshabinlar orasida poytaxtdagi 6 ta «Mehribonlik uyi» tarbiyalanuvchilari ham bor edi. Ular «Kapitoshki», «Smeshariki» shou-guruhi – koreys va polyak madaniyati markazi raqs jamoalari, shuningdek, o'zbek estradasining mitti yulduzchalari – Xadicha Imomnazarova, Aziza Karimova, Leya, Samira Bulgakova va bolalar ijodiy jamoalari ishtirokidagi konsert dasturini katta qiziqish bilan kuzatishdi, ularga jo'rovoz bo'lib qo'shiq kuylashdi, raqsga tushishdi. Teatr galereyasida tashkil qilingan «Sen yolg'iz emassan» bolalar ijodiyoti markazi a'zolarining rasmlar ko'rgazmasini tomosha qilishdi.



Bolajonlar chizgan rasmlarni biz ham maroq bilan tomosha qilayotgandik, ko'zimiz bolajonlarning sevimli aktyori, teatr rejissyori Fatxulla Xo'jayevga tushib qoldi. Fursatdan foydalanib, u kishi bilan teatr faoliyati, muammolari haqida suhbatlashdik:

– Xabaringiz bormi, yo'qmi, bu yil Respublika qo'g'irchoq teatrimiz tashkil topganiga 70 yil bo'ladi. Shu kunlarda oktabr oyida nishonlanadigan yubiley taraddudidamiz. Sharq ertaklaridan biri «Ming bir kecha»ni sahnalashtiryapmiz. Nasib bo'lsa, teatrning yetmishinchi mavsumini ana shu spektakl bilan ochish niyatidamiz. Shu kunlarda jajji tomoshabinlarga «Karvonsaroy», «Zolushka» nomli spektakllarni o'zbek va rus tillarida namoyish etyapmiz. Ikki tilda namoyish etishimizning boisi, aksariyat

QO'G'IRCHOQ TEATRIGA BORASIZMI?



tomoshabinlarimiz rusiyazon o'g'il-qizlardir. Negadir millatimizda qo'g'irchoq teatriga pastroq nazar bilan qaraladi. Vaholanki, san'atning bu turi bizga kecha yo bugun o'zga bir millatdan kirib kelmagan. Olimlarimizning izlanishlariga ko'ra, bu san'at tarixi juda qadimga borib taqaladi. Vaholanki, Navoiy davridan qo'g'irchoq teatriga «Chodir jamol» (qo'lqopli qo'g'irchoq), «Chodir xayol» (ipli qo'g'irchoq), «Fonus xayol» (soya teatri) kabi turlari ma'lum bo'lgan.

Muammolarga kelsak, qo'g'irchoq teatri uchun maxsus yozilgan pyesalarning kamligi bizni biroz o'ylantiradi. Shuning uchun ham asosan tarjima pyesalarini sahnalashtiryapmiz. Menimcha, bolalarning tarbiyasi, ma'naviyati uchun

qo'g'irchoq teatri kerak. Zero, har bir spektaklning o'ziga yarasha tarbiyaviy ahamiyati bo'ladi. Milliy libos «kiygan» qo'g'irchoqlarimiz bolajonlar qalbida milliy urf-odatlarimiz, an'analarimizga hurmat ruhini shakllantiradi...

TAHRIRIYATDAN:

Qadrlı kichkintoylar, siz-chi, qo'g'irchoq teatriga borasizmi? To'g'rirog'i, bunday savol bilan bolalarga emas, ularning ota-onalariga murojaat qilsak, to'g'ri bo'ladi. Hademay farzandlaringizning yozgi ta'til kunlari boshlanadi. Ularni jajji qo'lgaharidan tutib, qo'g'irchoq teatriga olib boring. Tomoshadan so'ng spektaklning qisqacha mazmunini, taassurotlarini so'rang. Hayajonli hikoyalari bilan Sizni hayratga solishiga aminmiz.

FERUZA suhbatlashdi,
ZEBO qiz olgan suratlari

BIR SABOQ BO'LSA...

Onajonim tabiat



Ma'lumki, suv tabiatning asosiy ne'matlaridan hisoblanadi. Yer kurrasining 71 foizi suvlik bo'lib, uning atigi 0,025 foizi suyuqlik holida, 1,6 foizi abadiy muzliklardan iborat. Mana shu raqamlarning o'ziyoq bizni hushyorlikka chorlaydi. Ichimlik suvining qadrini bilgan insonlar undan oqilona foydalanadilar. Dalalarga rejali asosda suv berib, dahana boshlariga suv o'lgahichlar o'rnatishyapti. Seleksioner olimlarimiz ham qurg'oqchilik va suvsizlikka chidamli bo'lgan, barglari kichkina, suvni kam bug'lantiruvchi o'simlik navlarini yaratishyapti. Ekinlarni «yomg'ir»latib va tomchilatib sug'orish usullariga o'tilmoqda. Andijon viloyati «Suvoqava» ishlab chiqarish birlashmasida ham ichimlik suvidan tejamkorlik bilan foydalanish maqsadida yangi dasturlar ishlab chiqilib, ularni amalga oshirish jarayonida millionlab so'mlar tejalmogda.


Shunday xayrli ishlar amalga oshirilayotgan bir paytda oramizda ichimlik suvini isrof qilayotgan va ifloslantirayotgan insonlar ham uchrab turgani achinarli holdir. Ayniqsa, shahrimizdagi ichimlik suvi hisobiga faoliyat ko'rsatayotgan avtomashinalar yuvish shahobchalarini aytmayisizmi? Ko'pincha suv quvurlari jo'mraklaridan gugurt cho'pi yo'g'onligida suv

oqib yotishining guvohi bo'lamiz. Lekin bu holga unchalik e'tibor bermaymiz. Suv shu tarzda oqib tura-versa, 12 daqiqada 2 litrli idish to'ladi. Mas'uliyatsizligimiz tufayli bu hol oylab yoxud yillab davom etsa-chi? Bir yilda 86400 litr suv isrof bo'lar ekan. Bu esa 508 taga yaqin insonning suvga bo'lgan bir kunlik ehtiyoji demakdir.

Bugungi kunda sayyoramizda bir milliarddan ortiqroq inson toza ichimlik suvi iste'mol qilish imkoniyatiga ega emas. Shu tufayli har yili 4 million bola halok bo'lar ekan.

Bu ayanchli ma'lumotlarni bejiz keltirayotganim yo'q. Toza ichimlik suvini behuda sarflayotgan, jo'mragi ochiq qolgan suv quvurlari yonidan befarq o'tib ketayotgan tengdoshlarim, afsuski, ayrim kattalar ham shoyad o'zlariga tegishli xulosa chiqarib olsalar.

Pokiza
ABDURAHMONOVA,
Toshkent shahar,
Mirobod tumanidagi
328-maktab
o'quvchisi



DUNYOGA OVOZA QILSAM...


Men Chirchiq shahridagi 25-umumta'lim maktabining 4-«B» sinfida tahsil olaman. O'qishlarim a'lo, maktabimizda o'tadigan tadbir va tantanalarda faol ishtirok etaman. Yaqinda sinfimizda «Balli, qizlar!» deb nomlangan ko'rik-tanlov bo'lib o'tdi. To'rt bosqichda o'tadigan tanlovga barchamiz puxta hozirlik ko'ra boshladik. Jumladan, men ham. Tanishtiruv shartini o'zim yozgan she'rim asosida bajardim. Keyingi shartlarni ham a'lo darajada bajarishga harakat qildim. O'zim tikkan libosim, tayyorlagan salatim haqida batafsil gapirib berdim. So'nggi shartga binoan yoqimli kuy ohangiga raqsga tushyapman-u, ko'zim hakamlar qo'lidagi tayoqchada. Aslida-ku, tanlovda faqat g'olib bo'lish uchungina emas, qobiliyatimni yana bir bor sinab ko'rish maqsadida qatnashyapman. Lekin ota-onam, ayniqsa, buvijonim ishonchini oqlab, g'olib bo'lsam, yomon bo'lmasdi-da...

Nihoyat, orziqib kutilgan damlar yetib keldi. Hakamlar hay'ati a'zolari to'plagan ballarimizni hisoblab, eng ko'p – 80 ball to'plaganim uchun meni tanlovning g'olibi deb topishdi. Ustozimiz menga medal va «Faxriy yorliq» topshirayotganida,

hayajonimni bir ko'rsangiz edi... Ularni olib, uyga shoshdim. Ketyapman-u, quvonchim ichimga sig'may boryapti. Shodligimni tezroq uydagilar bilan baham ko'rgim, quvonchimni butun dunyoga ovoza qilgim kelardi.

Ishonamanki, oldinda meni bundan-da kattaroq muvaffaqiyatlar kutyapti.

Maftuna BOTIROVA





– Egam, rostdan ham sen o'shanda quyon o'g'irlaganmisan? – deb so'radi Shokir. U yo'q joydan gap qo'zg'agani, gap qo'zg'ash orqali biror o'rtog'ini uyaltirib, keyin o'sha o'rtog'ining tilini qisib olishni xush ko'rardi. Goho uni chaqimchi Shokir ham deyishardi. Mana shu bola hozir uyalibgina o'tirgan Egamberdining g'ashiga tekkisi kelib qoldi.

– Shokir, senlarga ming martta aytganman-ku, G'ulom g'uppaning quyonlarini daftarga almashtirganman deb, – shunday deb, Egamberdi yuzini teskari o'girib, deraza orqali hovliga tikilib o'tirdi.

Shokir yana tinchimadi:

– O'g'irlamasang, nega milisa qamab qo'yadi seni?

– Jim bo'l, deyapman, – Egamberdi sekin o'rnidan tura boshladi.

Shokir jim bo'lmadi.

– Keyin, baribir, direktorning xonasiga tosh otgansan-ku, derazani buzgansan-ku.

– Jim, deyapman, – shunday deb, Egamberdi asta Shokirga yaqinlashib kela boshladi. Azizov domlaning haligi harakati uning alamini oshirgan edi. Shokir chaqimchining bu gapi dard ustiga chipqon bo'ldi. Xo'rlangandek sezib, o'zini bosolmay qoldi:

– Jim bo'l, deyapman, bo'lmasa, hozir boshingni yoraman, – qo'lini musht qilib qattiq gapirdi Egamberdi.

– Sen-a, meni-ya, qibla mahallaning bolasini-ya! – shu so'zdan keyin Shokir chaqimchi ikki mushtini qo'ltig'i ostiga olib, kaftlarini bamisoli quyonchaga o'xshatib yozib, turgan joyida quyonga o'xshab sakray boshladi, – quyonim, quyonim, nega erta uxlaysan, nega

QUYONLAR SALTANATINING SHAHANSHOHI

Egamga shafqat qilmaysan?

Egamberdi haqida qishloqda, maktabda har xil gaplar ko'p tarqalgan. Ashaddiy quyonboz bu o'smir haqida yolg'on-yashiq gaplar ham ko'paygan. Egamberdining onasi Egamberdiga qo'shib, quyon ham tuqqan emish. Egamberdi uyqusirab o'z singlisi bo'lmish quyonchani bosib o'ldirib qo'ygan emish, o'sha o'lgan quyoncha ertasiga tirilib kelib, o'rningdan tur, maktabga kechga qolyapsan, deganmish. To'g'ri, Egamberdining quyonga bo'lgan ishqibozligi ikkinchi sinfdaligidayoq boshlangan. O'shanda dalada quyon bolalagan edi. Egamberdi buni ko'rib qolib, quyonning to'rtta bolasini uylariga olib kelib boqqan. Bir yilgacha ancha ko'paytirgan ham. Keyinchalik o'gay onasi Shakarxon aya: «Uy ishlariga qarashmay qo'yding, sigirni boqmay qo'yding, shu quyonlaringni yoqotmasam...», deb Egamberdi uxlab yotganda, quyonlarini ko'chaga haydagan. Agar yana uyga quyon olib kelsang, seni yetimlar uyiga topshiraman, deb qo'rqitgan.

Shu paytda, qalbi iztirobga, alamga to'lib turgan paytida Shokirning masxara qilib, ustidan kulishi juda-juda alam qildi. Yugurib kelib, chaqimchining ustiga tashlandi. Shokirning qulog'i ostiga shunday bir musht kelib tushdi, zarbi ham shunday kuchli ediki, Shokir gandraklab borib yiqildi. O'zini tezgina o'nglab oldi-yu, Egamning yoqasiga yopishdi.

Xunuk manzara boshlandi.

Sinfdagi o'g'il-qizlar ikki tarafga bo'linib ketishdi. Soy mahalla bir tomonga, qibla mahalla bir tomon:

– Ur!

– Tur o'rningdan!

– Bo'sh kelma!

– Qo'rqsang, mana, men borman! – degan past-u baland gaplar avjiga chiqib boryapti.

Qizlar:

– Voy, ajratsanglar-chi! – deyishyapti.

O'g'il bolalar:

– Charchashsa, o'zlari ajralishadi.

– Sport musobaqasi ketayapti.

– Soykeldi, bosh kelma, – degan gaplarni tinmay aytishyapti.

Xonkeldi qishlog'ida hech qanday tartibga

Xudoyberdi TO'XTABOYEV,
O'zbekiston xalq yozuvchisi

Boshi o'tgan sonlarda

Qadam Said MUROD

DOVYURAK, DONO MALIKA

VI


Shoh buyurib zudlik bilan,
Soldirmoqni elga jar,
Jang haqida butun xalqqa
Berishganmish tez xabar.
Biron kishi tushmay hatto,
Bu xabardan dahshatga.
Shahar xalqi yoppasiga
Ko'chib harbiy holatga.
Ov yarog'i, bolta, tesha,
Kosovlarni tayyorlab.
Yov qal'aga bosib kirsan,
Beramiz deb biz ham zarb.
Yetti yoshdan yetmish yoshlik –
Chol-u kampir, qizgacha,
Bo'lgan emish urushga shay
Uxlamasdan shu kecha...

VII

Lashkarboshi qo'shinini
Keng maydonga etib saf,
Bo'lib har xil bo'limlarga
Boshliqlarni tayinlab.
Vaziyatni tushuntirib,
Qurol bilan ta'minlab,
Harbiyyona farmon berib
Ishlatmasdan ortiq gap,
Har bo'limga ko'rsatib o'z –
Mudofaa nuqtasin,
Degan emish: «Bu kurashda
Har kim sherga o'xshasin...»

VIII

Qilichbozlar ot egarlab,
Darvozalar oldida.
Har birining yovga qarshi
Nafrat qaynab qalbida.
Piyodalar chiqib qal'a –
Devorlarin ustiga,
Har birisi borib, turib –
Ko'rsatilgan postiga.
Boqib maxsus tuynuklardan,
Qaroqchilar yo'liga,
O'qlarini shaylab qo'yib,



bo'ysunmaydigan, hech qanday qonunga rioya qilmaydigan, mushtlashish, eshakmindi, bov ustiga bov, dashtga, ho'v anavu tog' yonbag'ridagi kenglikka chiqib olib, velosipedning bosqoni singuncha, poyga uyushtirish singari yovvoyi o'yinlar avjiga chiqqan.

Qiziq, bugun jonchiqarga mushtlashadilar-u, ertaga yarashib, apoq-chapoq bo'lib ketaveradilar.

Qo'ng'iroq chalindi.

Salobatli geografiya muallimi salmoqli qadam tashlab, asta kirib kela boshladi:

– O'tir hammang joyingga! –

degan qattiq buyruq ham bo'ldi. Muallimning ovozi ham kuchli edi. Hamma o'z o'rniga o'tirdi. Hech narsa bo'lmagandek sinf xonasi jim-jit bo'lib qoldi, dars boshlandi. Sibir o'rmonlari haqida suhbat ketayapti.

IV bob

«Peshonasi»ga «Kimyo laboratoriyasi» deb yozib qo'yilgan, ichiga bor-yo'g'i to'rtta sariq suv to'ldirilgan shisha banka-yu, bo'g'zi ingichka bir-ikki shisha qo'yilgan xonada yangi kelgan kimyo muallimi bilan hozirgina hovlidagi yig'indan xo'rlanib qaytgan Hamidova opa o'rtasida yig'i aralash suhbat ketayapti.

– Ey singlim, siz yaqindagina keldingiz, bu ikki bola bilan direktorimiz oralarida bo'lgan dilsiyohlikdan xabaringiz yo'q. Ikkovlarini ham suyib bag'ringizga bossangiz, erkalab peshonasidan o'psangiz, arziydigan o'smirlar. Men ularni bolaligidan buyon bilaman, uch yildan buyon esa sinflariga rahbarman. Sinf rahbarlari bolaga onadek bo'lib qoladi. Bolalarning ko'nglini topsangiz, sizni onasidek sevib qoladi. Singlim, kechirasiz, siz Qo'qon institutini bitirdingizmi?

– Ha, kimyo-biologiya fakultetini bitirganman, – negadir uyalibgina dedi.

– Nega yil boshida kela qolmadingiz?

– Onajonim avval turmush qurgin, qiz boshing bilan jo'natmayman, – dedilar.

– Turmush qurdingizmi?

– Qurmasam, onajonim ruxsat berarmidilar.

– Ha, hamma onalar ham shunaqa, bolam bag'rimda bo'lsa, deydi.

– Opajon, shu ikki yigitchalar haqida juda-juda bilgim kelyapti.

– Ey, singlim, ismingiz Shohistaxonmidimi?

– Ha, Shohistaxonman. Ikkovlari ham qatordan yig'lagudek bo'lib chiqib ketishdi. Ustoz quyon o'g'irlading, militsiyaga tushding, deyapti, shularni ham bilgim kelayapti, opajon.


– Ey, singiljon, mana yaqinda sinf rahbari ham bo'lasiz, bolalar dunyosiga kirasiz, har bir bola bir dunyo ekanligini bilib borasiz. Bu ikki o'smirning taqdiri juda g'alati. Ikkovlari bir kunda tug'ilgan. Ota-onalarini o'rtadagi devor ajatib turadi, xolos.




Yoyin olib qo'liga.

Turgan emish har birisi
G'alabaga ishonib,
Bu holatni ko'rib chiqib,
Shoh qolganmish quvonib.
Shohning qizi Xumor kiyib
Erkaklarning libosin,
Zohir ikkov qurollanib
Ogoh qilmay otasin.
Aralashib ketgan emish,
Qilichbozlar ichiga.
G'azabidan ikkovin ham,
Kuch qo'shilib kuchiga.
Turganmishlar mardonavor
Dushmani yeb qo'ygudek,
Ollom tirik qo'lga tushsa
Ko'zlarini o'ygudek...

Davomi bor



«Umid nihollari – 2009» MUSHTARIYNING YANGRAGAN KUYI



M a k t a b
o'quvchilarining
an'anaviy «Umid
nihollari – 2009»
sport musobaqasi
j i z z a x l i k
o'quvchilarni
ham sinovlar
m a y d o n i d a
t o b l a d i.

Musobaqaning
maktablararo
bosqichida 1625
nafar o'quvchi,

jumladan, 663 nafar qizlar sportning 12 turi bo'yicha kuch va imkoniyatlarini sinab ko'rishdi. Musobaqalar shahar markazidagi zamonaviy sport majmualarida bo'lib o'tdi. Natijalarga ko'ra, respublika bosqichiga 128 nafar o'g'il-qiz saralandi.


G'allaorol tumanidagi 44-umumta'lim maktabining 5-sinf o'quvchisi Mushtariy Rashidova o'tgan yili viloyat musobaqalarida faol qatnashib, kumush medalni qo'lga kiritgan edi. Ayni paytda u badiiy gimnastika bo'yicha respublika musobaqasi birinchiligiga tayyorgarlik ko'ryapti. Yosh sportchining orzulari ko'p. U O'zbekiston madhiyasini sevib kuylaydi. Xalqaro maydonlarda ham madhiyamizni jo'shib kuylashni diliga tukkan.

Badiiy gimnastika bo'yicha murabbiy, sport ustasi Abdug'ani Usmonov tuman markazida klub ochganida, yillar o'tib, tuman maktablarida badiiy gimnastikachilar ko'payishiga umid qilgandi. Endilikda klubga 20-, 42-, 44- va 56-maktablardan 30 dan ziyod qizlar muntazam qatnab, badiiy gimnastika bilan shug'ullanmoqdalar. Mashg'ulotlar tuman sport majmuasida olib borilmoqda.

Badiiy gimnastika bo'yicha Dilnoza Jo'raqulova, Yulduz Mustafuqulova va Yulduz Narziqulova ham yaxshi natijalarga erishyapti. Ayni kunda ularning quvonchi cheksiz. Axir g'allaorollik gimnastikachilar ham respublika musobaqasi, «Umid nihollari – 2009» bahslarida ishtirok etishadi-da!

Abdulla SAIDOV

Maktabimizda futbol bo'yicha sinflararo musobaqa yakunlandi. Unda bizning sinf bolalari saralash bosqichigacha yetib kelib, tuman bosqichiga yo'llanmani qo'lga kiritishdi. Sinf doshlarimizni tabrikladik. Sportchi do'stlarimizni sinf




SINFIMIZ CHEMPION

rahbarimiz chempionlik bilan qutlab, xuddi onamiz kabi sevinib, ko'zlariga yosh oldilar.

Mahfuzaxon ABDUMANNONBJON qizi,
Andijon viloyati, Andijon tumanidagi
24-umumta'lim maktabning 8-«V» sinf o'quvchisi

HINDISTONLIK MEHMON «JAR»DA



«Jar» sport sog'lomlashtirish majmuasida O'zbekiston birinchiligi musobaqasi bo'lib o'tdi. Karate-do bellashuvlarida ishtirok etgan bolalar bu safar hindistonlik, Osiyo an'anaviy karate-do federatsiyasining prezidenti Rajib Sinxa bilan yaqindan tanishdilar. Chempionatda yurtimizning har go'shasidan yosh sportchilar ishtirok etdilar. Faxrli o'rinlarni qo'lga kiritgan farg'onalik, samarqandlik, qashqadaryolik,

qoraqalpog'istonlik hamda poytaxt jamoalari sportchilari medallarga ega bo'lishdi.

Nodira JUMANIYOZOVA,
TDTI qoshidagi 5-akademik litsey talabasi

QISHLOQ MAKTABI DEMANG...



Qishloq maktabi bo'lsa-da, hech bir shahar maktablaridan qolishmaydigan ilm maskanimiz kundan-kunga ko'rkamlashib bormoqda. Ayniqsa, Malohat Xolliyeva rahbar bo'lib kelganlaridan so'ng, maktabimizga yanada fayz kirdi.

Eski bino ta'mirlanib, zamonaviy binoga aylantirildi. Obodonchilik ishlari avj oldi, gulzor barpo etildi. Fizika va kumyo xonalariga yangi jihozlar olindi. Sport zali haqida ku gapirmasam ham bo'ladi. Turli sport anjomlari bilan jihozlangan, zamon talablariga javob beradigan kattakon zalimiz bolajonlar ixtiyorida. Voleybol, futbol, basketbol, shaxmat-shashka kabi sport to'garaklarimiz doimo gavjum. Bunday g'amxo'rliklardan quvongan ustozlarning ham g'ayratlariga g'ayrat qo'shilmog'da.

Yaqinda maktabimizda ochiq darslar yuzasidan seminar o'tkazildi. Viloyatimiz o'qituvchilari ishtirok etgan seminarda ustozlarimiz darslari eng namunali deb topildi.

O'z navbatida o'quvchilarimiz ham tirishqoq, izlanuvchan. O'qishlari a'lo, jamoat ishlarida ham faollar. Maktabimizda deyarli har kuni tadbir o'tkaziladi. Tadbirlar tadbirlarga ulanib ketadi.

Yaqinda maktabimizda sardorlar bellashuvi o'tkazildi. Qiziqarli savol-javoblarga biz ustozlar ham berilib ketdik. Sinflararo o'tkazilgan bellashuvda 6-«D» sinf o'quvchilari eng zukko ekanliklarini isbotlashdi.

Men mana shunday o'z kasbining bilimdoni bo'lgan o'qituvchilar-u, zukko o'quvchilar orasida ekanligimdan faxrlanaman.

Laylo HAITOVA,
Termiz tumanidagi
16-maktabning geografiya fani
o'qituvchisi



«BEKORCHILIK BIZGA BEGONA»

Har bir san'atkorning o'z muxlislari bo'ladi. Men «Mirzo» teatri rahbari Mirzabek Holmedov ijodini anchadan buyon kuzatib boraman.

Teatrning yaqinda namoyish etilgan «Bir yilda bir mazza» nomli tomoshasi hammaga birdek yoqdi. Buni tomoshabinlarning yuzlaridagi samimiy kulgularidan, guldiros qarsaklaridan anglash mushkul emasdi.

Dasturdan so'ng Mirzabek Holmedovni suhbatga chorladim:

– Bolaligimiz mehnat bilan o'tgan. Bekorchilik bizga begona edi. Tengdoshlarim bilan qo'y boqardik. O'shanda bir-birimizga qiziqarli latifalar, kulguli voqealar aytib, kayfiyatimizni ko'tarardik. Gohida qiziqchilikka berilib ketib, qo'ylarimizni ham unutib qo'yardik.

Maktabda ham o'qishlarimiz yomon bo'lmagan.

Bugungi o'quvchilarga ham havas qilaman. Ular dunyoga chiqmoqdalar, chet ellik tengdoshlari bilan bemalol

tillashmoqdalar. Eng rivojlangan davlatlar farzandlaridan kam emaslar. Fan olimpiadalari, sport musobaqalari, san'at bobida dunyoni zabt etmoqdalar.

Ularga qarab, barakalla, aziz bolajonlarim, aslo bo'shshang, degim keladi.

Botir RAMAZON



Malika Husenova Buxoro viloyati, Buxoro shahridagi 22-maktabning 6-sinfida a'lo baholarga o'qib kelyapti.

Uning adabiyotga, she'riyatga ixlosi baland. Hayrat to'la ko'zlari bilan borliqni kuzatadi, ko'rganlarini qog'ozga tushiradi. Bolalikning betakror olamini kuylaydi.

BOLALIGIM!

Afsonaviy qushmisan,
O'ngimmisan, tushmisan,
Tog'lardagi gulmisan,
Bolaligim, bolalik?!

Hech unuta olmadim,
Va ortingdan qolmadim.
Yurib-yurib tolmadim,
Bolaligim, bolalik.



BOG'LARI GO'ZAL

Gul yurtimning bog'lari go'zal,
Huv, purviqor tog'lari go'zal.
To'lib oqar soylarida suv,
Sharqiraydi, go'yoki g'azal.

Go'zal tongdan ilhomlar olib,
Men shuurli she'rlar bitaman.
Tabiatning gul quchog'ida,
Har kun oppoq tongni kutaman.

Bolaligida adabiyot fanidan berilgan barcha she'rlarni ohangga solib aytisagina, yodlay olgan san'atkorini bilasizmi?

«Sog'indim, bahorim», «Azizim», «Onajon» kabi qo'shiqlari bilan elga tanilayotgan xonanda opangiz Shahlo Safarova ana shunday xonandalardan.

– Shahlo opa, sizning qo'shiqlaringizni televideniye, radio orqali eshitganmiz. Eng birinchi qo'shig'ingizni balki maktab sahnasida kuylagandirsiz? – deya suhbatga chorladik.

– Samarqanddagi katta bir qo'shiq tanlovida «Men senga uvolman» nomli qo'shig'im bilan ishtirok etib, 2-o'rinni olganman. Bu mening ilk ijroyim va yutug'im bo'lgan. O'shanda musiqa va rassomchilik bilim yurtida tahsil olardim. O'quvchilik yillarim Samarqanddagi Alisher Navoiy nomli 27-maktabda o'tgan. Maktab sahnasida ham ko'p ashula aytganman. Aslida, yuqorida aytganingizdek, o'sha qo'shiqlar mening birinchi qo'shiqlarimdir.

– Maqsadingizga erishish yo'lida kimlar ustozlik qilishdi?

– Xalqimiz suygan san'atkorlardan Olmaxon opa Hayitova, Alisher aka Ikromovni, qolaversa, barcha ustoz san'atkorlarni o'z ustozim deb bilaman. Mening san'at olamiga kirib kelishimga Xurshid Davron ham katta hissa qo'shganlar. Ulardan behad minnatdorman.

– Inson qaysi fazilatlarini bilan qadrlanadi?

– Bilasizmi, bolaligimda faqat bolalargina yolg'on gapirishadi, deb o'ylardim. Kattalar esa to'g'riso'z, samimiy bo'lishadi, deb ishonardim. Chunki insonlardagi ana shu fazilatlarini qadrlayman. Qolaversa, odamlar baxillik bilan emas, havas bilan, yaxshi tuyg'ular bilan yashashlarini istayman. Bolalarimizga ham shuni tilagim keladi.

– O'g'lingiz Alisherbek haqida ham gapirib bersangiz.

– Alisher Chilonzor tumanidagi 217-maktab o'quvchisi, mening maslahatgo'yim, do'stimdir. U ham musiqaga qiziqadi, ijodimning ilk baholovchisi ham o'g'lim. Bundan tashqari, sportga qiziqadi. Orzusi esa huquqshunos bo'lishdir. Bilasizmi, ba'zan u qo'shiqlarimni tinglab, quvongancha men bilan faxrlanishini aytadi. Shunda men: «Kelajakda men sen bilan faxrlanay, bolam», deya niyat qilaman. Yurtimizdagi barcha bolalar ota-onalariga, Vatanimizga munosib farzand bo'lib voyaga yetishlarini istayman.

Sayyora JO'RAYEVA suhbatlashdi

LINVORD

E.ORIPOV tuzgan

Oz miqdor	Suv yo'li	Shifo	Sharh	Istak	Izzat-ikrom	Adabiy janr	Musiqa asari	Mehnat haqi	Futbol jamoa	Taniqli kishi	Rossiyadagi tog'lik	Qal'liq
Kam-suqum	Daraxt tarmog'i	Notiq	Mato par-dozi	Paydo bo'lish, aks etish	Qog'ozdagi yozuv	Ehtiyot qilish	Yasama soch	Do'st, o'rtoq	Olamni o'rganish, sayohat	Shoh va shoir	Dav-ra qo'shi-g'i	



BOSH MUHARRIR:
To'lqin HAYITOV

Muassislar:

O'zbekiston Matbuot va axborot agentligi,
O'zbekiston Respublikasi Xalq ta'limi vazirligi,
«KAMOLOT» yoshlar ijtimoiy harakati Markaziy Kengashi,
«SOG'LOM AVLOD UCHUN» hukumatga qarashli bo'lmagan Xalqaro xayriya jamg'armasi.

Dizayner va sahifalovchi:
Zuhra MUHSIMOVA
Navbatchi:
Gulyuz ORIFJONOVA

Gazeta O'zbekiston Matbuot va axborot agentligida 0208-raqam bilan 2007-yil 2-fevralda ro'yxatdan o'tgan.

TAHRIR HAY'ATI:
G'ayrat SHOUMAROV,
Svetlana INOMOVA,
Qahramon QURANBOYEV,
Odina JAMOLDINOVA,
Jabbor RAZZOQOV,
Feruz JALILOVA
(Bosh muharrir o'rinbosari),
Dilmurod RAHMATILLAYEV,
Dilshoda DADAJONOVA

Manzillimiz:
700129,
Toshkent shahri,
Navoiy ko'chasi, 30-uy,
Obuna indeksi: 198,
e-mail: tong1924@mail.ru
Tel: 244-27-25, 244-63-08
Tel./faks:
(99871) 244-38-10

«O'zbekiston» nashriyat-matbaa ijodiy uyida chop etildi.
Haftaning dushanba kuni chiqadi.
Shakli A-3,
2 bosma taboq.
ISSN 2010-6092
Adadi - 60252
Buyurtma N: J 7409